
Fra: Øyvind Strømmen <oyvindstrommen@gmail.com>
Sendt: mandag 15. februar 2021 12:28
Til: Oskar Røen; Magni Petersen; Knut Harald Frøland; Ingebjørg Vamråk;
Postmottak Samnanger; Jan Erik Boge; Samningen
Emne: Interpellasjon frå MDG: Lysureining

Underteikna vil i kommunestyret 25. februar setja fram følgjande interpellasjon:

Lysureining i Samnanger, kva kan kommunen gjera?

13. januar 2021 etterlyste Naturvernforbundet nasjonalt fleire tiltak mot lysureining, både på nasjonalt og lokalt nivå. Dei meiner blant anna at alle kommunar må innføra lysplanar, og at Forureininglova bør brukast for å hindra uønska og unødvendig lys.

Lysureining påverkar den naturlege døgnrytmen vår, og forstyrrar dessutan liva til mange dyr, insekt og plantar negativt, noko som blant anna er nærare omtalt i ein rapport frå Norsk institutt frå naturforskning frå 2015, "Effekter av kunstig nattbelysning på naturmangfoldet - en litteraturstudie". I tillegg går lysureining utover opplevinga av stjernehimmelen dei kveldane og nettene været i Samnanger faktisk let oss sjå denne. Og lysureininga medfører dessutan unødvendig bruk av både energi og pengar.

Underteikna vil elles syna til rettleiaren "Bevar mørket", som ein finn på nettsidene til organisasjonen med same namn; samt til rettleiaren "Lys på stedet" utarbeidd av tre departement i 2012, der det blant anna heiter: "I mange norske byer og tettsteder brukes lys helt ukritisk, og kunnskapen om lysforurensning er liten. Det er viktig å utvise forsiktighet ved lysbruk for å unngå uheldige lyseffekter på omgivelsene som både kan være sjenerende og helseskadelige".

Lysureining er ei utfordring også i Samnanger. Underteikna har sjølv reagert på det som framstår som overdriven lysbruk ved idrettsanlegget i Hagabotnane, og har også blitt kontakta av nokon som reagerer på at det er montert kraftige lys langs vegen ned til den nye badevika på Bjørkheim, som - fekk me opplyst - står på store delar av døgnet. I samband med handsaminga av den nye turvegen for fotgjengarar og syklistar frå øvst på Steinsland og til Hagabotnane peikte også naturutvalet sin utvalsleiar på lysureining som ei mogleg problemstilling som burde sjåast nærare på. Medan MDG Samnanger ynskjer fortgang i eit viktig prosjekt for å korta ned vegen frå Steinsland til Hagabotnane, er dette eit sjølvstendig poeng som fortener å bli løfta i kommunestyret.

På grunnlag av dette vert det stilt følgjande spørsmål:

1. Kva meiner ordføraren bør gjerast for å redusera unødvendig lysbruk i Samnanger?
2. Kva kan gjerast for å syta for at lys på kommunale og andre anlegg i større grad er skrudd av på seine kveldar og på nattestid, eller kopla til sensorar som gjer at lyset ikkje står på unødvendig?

Det vert også sett fram følgjande framlegg:

1. Samnanger kommunestyre meiner det er grunn til å ta lysureining på alvor som problemstilling. Kommunestyret vil difor at bruk av sensorar eller andre løysingar for å redusera unødvendig lysbruk skal vera ein del av framtidige prosjekt der det vert aktuelt med belysning ved bygg, langs vegar osv.
2. Samnanger kommunestyre ber om at det vert gjort ein gjennomgang av eksisterande kommunal lysbruk, med siktemål om å redusera unødvendig lysbruk, evt. med installasjon av sensorar eller andre tiltak, og ber om at det vart lagt fram ei eiga sak for kommunestyret om dette. For eventuell finansiering kan det nyttast midlar frå kommunen sitt berekraftsfond.
3. I arbeidet med ny klima- og energiplan for Samnanger kommune ber kommunestyret om at tiltak for å redusera lysureining også vert vurdert nærare.

mvh

Øyvind Strømmen
kommunestyrepolitikar, MDG



Virusfri. www.avast.com